

卷五 六歷代高僧

卷六 七王臣外護

八仙隱流寓

卷七 九古今藝文

卷八 十動植物產

十一 蔣編志餘

義眉山志 葉恭綽敬題

下冊

民國二十三年秋月製版流通

峨眉山志上下二冊

同證無上道	風雨常調順	展轉流通者	悉皆盡滅除	圓成勝善根	願以此功德	願君二圓	慈法師印二十部	慧勳君	丞君各二十圓	夫君廿五圓	成君	本德君各一百圓	君	李俊承君	眞達和尚	峨眉山志初版印三千部助印功德芳名列後
印光校畢普爲大衆回向謹識	人民悉康寧	現眷咸安樂	人各習禮讓	所有刀兵劫	消除宿現業		南嶽覺觀師五圓	劉衡台君	趙運昌君	郁智朗君	陳荻洲君各五十圓	永嘉周宅九十圓	蔣特生君	郭輔庭君	上海交易所聯合會各二百圓	
	法界諸含識	先亡獲超昇	一切出資者	及與饑饉等	增長諸福慧		龐智	石松巖君各十圓	郭海珊君	李圓淨君	薛立	顧穀	倪雲來君	趙惜陰		
								興	李	顧聯	吳					

藏版處

蘇州護龍街南段
弘化社

穿心街報國寺內

上海開北新公路國慶路口
世界佛教居士林

弘化社

流通處

上海貴州路一二五號

功德林佛經流通處

上海膠州路愚園路口

佛學書局

印刷者

上海南成都路新大沽路口
國光印書局

電話三三七四三號

峨眉山志卷五

第六歷代高僧附塔銘 附居士

佛法僧三寶爲世福田。佛已滅度。法不自宏。其傳法道而度衆生。續慧命而啓後覺者。唯僧是賴耳。峨眉爲普賢菩薩道場。得具大誓願。大精進。大禪定。大智慧之。高僧宏揚之。則普賢無盡之行。如來最妙之道。人人皆得修而證之矣。故志高僧。晉千歲寶掌和尚。中印度人。周威烈王十二年丁卯降神。受質。則左掌握拳。七歲祝髮。乃展因名寶掌。魏晉間。東遊此土。入蜀禮普賢。留大慈。常不食。日誦般若等經千餘卷。有詠之者曰。勞勞玉齒寒。似迸巖泉急。有時中夜坐。階前神鬼泣。一日謂衆曰。吾有願住世千歲。今六百二十有六矣。故人以千歲稱之。旋遊五臺。復南歷衡岳。黃梅。匡廬。尋入建業。會達磨入梁。就而叩請。悟無生忍。武帝高其道臘。延供內庭。未幾。如吳。述偈曰。梁城遇導師。參禪了心地。飄零二浙遊。更盡佳山水。遂徧探兩浙名山。後居浦江之寶嚴。與朗禪師友善。每通問。遣白犬馳往。朗則使青猿。故有題朗壁者。

云。白犬銜書至。青猿洗鉢回。至唐高宗顯慶二年正旦。手塑一像。經九日成。謂門人慧雲曰。此肖誰。雲曰。與和尚無異。卽澡浴易衣趺坐。謂雲曰。吾住世已一千七十年。今將謝世。聽吾偈曰。本來無生死。今亦示生死。吾得去住心。他生復來此。又囑曰。吾滅後六十年。有僧來取吾骨。勿拒。言訖而逝。入滅五十四年。有刺浮長老。自雲門至塔所。禮曰。冀塔洞開。少選塔戶果啓。其骨連環若黃金。浮卽持往秦望山。建窣堵波奉藏。以周威烈王丁卯。至唐高宗顯慶二年丁巳。實一千七十一年。其在此土。蓋歷四百餘歲云。

晉阿羅婆多尊者。西域聖僧也。來禮峨眉。觀山水環合。頗同西域化城寺地形。遂依此而建道場。山高無瓦埴。又雨雪寒嚴。多遭凍裂。故以木皮蓋殿。因呼爲木皮殿。晉釋慧持。遠公之弟。與遠共事道安法師。及安在襄陽。遠公東下。持亦俱行。初憩荊州上明寺。後適廬山。皆隨遠共止。持欲觀瞻峨眉。振錫岷岫。乃以晉隆安三年。辭遠入蜀。遠苦留不住。歎曰。人生愛聚。汝獨樂離。如何。持亦悲曰。若滯情愛聚者。本不應

出家。今既剖欲求道。正以西方爲期耳。於是兄弟拭淚憫默而別。到蜀止龍淵精舍。四方慕德。所至成侶。刺史毛璩。耆宿惠巖。僧恭。皆望風推服。有升持堂者。號登龍門。後因譙縱之亂。殺璩及巖恭等。持避難之郫縣中寺。縱有從子道福。凶悖尤甚。將兵往郫討戮。入寺。人馬浴血。衆僧驚走。持在房前盥洗。神色無忤。道福直至持邊。持彈指澆水。澹然自若。福愧悔流汗。出寺門。謂左右曰。大人故與衆異。後境內清恬。還止龍淵。講說齋懺。老而愈篤。以晉義熙八年卒。春秋八十有六。臨終遺命。務最律儀。謂弟子曰。經言戒如平地。衆善由生。汝等行住坐臥。宜其謹哉。

附考。宋時嘉州道左大樹。因風吹折。穴中有一定僧。頭髮蓋身。爪甲圍腰一帀。有司以聞。迎至都下。令西僧總持。擊金磬再拜。乃出定。叩之曰。吾遠法師弟也。再叩曰。吾將往陳留。遂復入定。明萬曆末。四川按察曹公學佺云。往在金陵。同年金礪爲言。近日陳留古廟。因取土修理。掘其下。有三缸。蓋底皆俯。其中仰者。有定僧坐焉。爪甲繞身。羣衆喧譁不已。聊一開眸。問曰。是何時。衆答曰。萬曆某年也。曰。吾尙

早仍閉目。衆努力搖之不動。衆懼。遂覆之如初。按高僧傳載。持卒於龍淵。今山頂有老僧樹。云是持入定處。未知孰是。詳志餘。按明嘉靖間。灌縣青城山樵陽子。亦有前身坐蛻樹中事。孫柏潭先生有傳。載四川總志。

晉釋明果。資州人。幼薙髮。龍遊山。謁秦竺法護於大興善寺。一日聞護開示如來座者。一切法空是。頓悟厥旨。回蜀。就寶掌峯卓錫。中峯始號乾明觀。彼中道士。每於三月三日。效翟武升仙之法。歲以爲常。師聞。知是妖孽。請讓先升。階伏獵人。箭綴絲綸。果中之一白蟒也。尋理其處。乃見冠簪白骨滿窟。羽人悔悟。卽觀改爲中峯寺。迎師承事焉。

字文周。釋寶象。姓趙氏。本安漢人。後居緜州滿隆之蘇溪。年七歲。至巴西郡。太守楊眺問云。聞兒人讀書。因何名爲老子。象曰。始生頭白故也。眺密異之。冠歲出家。卽受具戒。後還涪州。開化道俗。又抄集醫方。療諸疾苦。或報以金帛。一無所受。象雖道張井絡。風播岷峨。見大乘一經。未弘蜀境。爲之疏記。欲使後學有歸。忽感風疾。不言久。

之命將絕。私心發誓。願諸佛護念。作是念已。忽然能語。後卒於潼川光興寺。卽縣州振響寺也。時保定元年。

隋茂真尊者。日遊呼應。夜宿棋盤。二處古迹現存。

唐昌福達道和尚。眉州人。初參晦機。回峨眉。住華嚴寺。僧問。學人來問。則對。不問。時意旨如何。曰。謝師兄指示。曰。本來則不問。如何。是今日事。曰。師兄此問大好。曰。學人不會。時如何。曰。謾得。卽得。曰。國有寶刀。誰人得見。曰。師兄遠來不易。曰。此刀作何形狀。曰。師兄要也。道。不要也。道。曰。請師道。曰。師兄難逢難遇。曰。普賢云。何駕石船。曰。師是這箇。亙古亙今。西禪和尚問。佛是摩耶降。未審和尚是誰家子。師曰。水上問。如何是密室中人。師曰。非男女相。問。國內按劍者誰。師曰。昌福。曰。忽遇尊貴時如何。師曰。不貴。

唐趙州禮峨眉。於放光臺。不登寶塔頂。僧問。和尚云。何不到至極處。州云。三界之高。禪定可入。西方之曠。一念而至。惟有普賢。法界無邊。

唐黃檗老人禮峨眉至觀佛臺霧氣澄霽曰云何不見僧問不見甚麼檗云不見普賢。

唐南泉老人禮峨眉觀白雲光紫曰還有這點霞氣在僧問和尚是那一點泉云東則東北則北僧便禮拜。

唐靈龜和尚成都人參陝西青峯禪師回峨眉住靈巖寺僧問如何是諸佛出身處曰處處非千佛春來草自青又問碌碌地時如何曰試進一步看僧曰不知前進處師曰步步踢著。

唐白水和尚初參夾山善會禪師回峨眉居白水僧問如何是西來大意曰四溟無窟宅一滴潤乾坤又問曹溪一路合譚何事曰澗松千載鶴來聚月中香桂鳳凰歸唐洞溪和尚初參樂普曰月樹無根枝覆陰普曰森羅秀處事不相依淥水千波孤峯各異師有省一日普問曰螺螄爲甚麼被蛇吞去也師曰幾度扣關拈不出持錫便行普曰善哉又憶普賢回峨眉。

唐澄照大師初參投子。回蜀住白水寺。每日六時朝禮普賢大士。僧問。諸佛有難。向火燄裏藏身。衲僧有難。向甚麼處。師曰。水晶石上起波文。大地衲僧都在裏許。又問。云何是初生月。曰。大半人不見。

唐西禪和尚。本州人。昔參曹山。曰。佛是摩耶降。未審和尚那家子。山曰。石頭漂在水裏。曰。三十六路阿那一路最妙。山曰。不出第一手。曰。忽被出頭時如何。山曰。脊著地也不難。

唐慧覺禪師。謁台州勝光和尚。值光在繩牀上坐。師直到身邊叉手立。光問。甚麼處來。師云。猶待客話在。便下去。光乃拈拂子。下僧堂前見師。提起拂子問云。閣黎喚這箇做甚麼。師云。敢死喘氣。光低頭便歸方丈。師初參羅山。纔禮拜起。山云。甚麼處來。師云。遠離西蜀。近發開元。卻近前云。卽今事作麼生。山揖云。喫茶去。師擬議間。山云。秋氣稍煖。出去。師到法堂上。自歎云。我在西川峨眉山腳下。拾得一枝蓬蒿箭。擬撥亂天下。今日到福建道陳老師寨裏。弓折箭盡去也。休休。山明日升堂。師又出問。豁開

戶牖當軒者誰。山便喝。師無對。山云。羽毛未備。且去。後還蟠龍寺住。

唐正性和尚。住華嚴寺。前朝古殿一所。重修之。以旋篆結頂。至今呼爲雲篆殿。

羅漢和尚。初參香林澄遠禪師。回峨眉延福院。右邊住一小洞。常現禪定。僧問。如何是西來大意。師曰。井中紅燄。日裏浮漚。曰。如何理會。師曰。遙指扶桑日。那邊曰。如何是羅漢境界。師曰。地連香積水。門對勝峯山。曰。既是羅漢。爲甚麼卻被人轉動。師曰。換卻眼睛。轉卻髑髏。

布水巖和尚。昔參曹山。曰。寶劍未磨時。如何。曰。觸用不得。磨後何如。曰。用觸不得。又問。如何是西來大意。曰。一步踢著火光飛。於此有省。回峨眉白巖寺居。

黃龍繼達禪師。昔參晦機。回峨眉住光相寺。僧問。如何是師作用處。曰。橫鋪四世界。豎蓋一乾坤。問道滿來時。如何。曰。要羹與羹。要飯與飯。問。黃龍出世。金翅鳥滿空飛時。如何。曰。我問你金翅疾得飽否。僧無對。

黑水和尚。本縣人。因禮峨眉。參黃龍。曰。雪覆蘆花時。如何。曰。猛烈。師云。不猛烈。黃便

打師有省。自爾契緣。遊黑水峯下而居。有人來禮。問和尚尊號。曰。汝看山峯。喚作甚麼。

大乘和尚。青神人。初參雲門。回峨眉。住龍池四面峯。僧問。如何是勝峯。曰。直聳煙嵐際。曰。向上事何如。曰。立地三尺五。曰。如何是佛法大意。曰。興義門前鑿鑿鼓。曰。學人不會。曰。朝打三千。暮打八百。

唐東汀和尚。本縣人。初參曹山。後居峨眉棋盤寺。僧問。如何是卻去底人。曰。石女紡麻。纜問。如何是卻來底人。曰。扇車關板。良計斷。僧禮拜。

唐慧通禪師。江陵人。洛浦元安法嗣。唐僖宗時。遊峨眉。望山峯奇異。有古肇公道場。欲往履之。溪水泛漲。偶感一虎至。卽騎虎跳過溪流。故名虎渡橋。厥後通聞朝廷。重興六寺。以山象火。遂改三雲。二水。壓抑火星。迄今全身供黑水祖堂。出傳燈錄。師有妹尼慧續。亦從兄闡化。有烏鴉報曉。二虎巡廊之異。白水瑋禪師。新羅金藏法嗣。曹山本寂孫。與洞山道延弟兄。白水仁禪師。洞山良价法嗣。黑水和尚有二。一黃龍晦。

機法嗣。巖頭全齋曾孫。一瀉山靈祐法嗣。與仰山兄弟。唐昭宗時人。禪燈世譜偶逸其名。黑水承璟禪師。德山緣密法嗣。雲門文偃孫。黑水義欽禪師。承璟法嗣。

宋白水如新禪師。玄沙師備法嗣。雪峯義孫。宋初住白水寺。

宋慧真廣悟禪師。益州人。受業於峨眉洞溪山黑水寺。參方慕道。遇雲門法席。密承指喻。乃開山創院。漸成叢林。開堂日。雲門和尚躬臨證明。僧問。如何是佛法大意。師曰。日出方知天下朗。無油那點佛前燈。問。如何是雙峯境。師曰。夜聽水流庵後竹。晝看雲起面前山。問。如何是法王劍。師曰。鉛刀徒逞。不若龍泉。曰。用者如何。師曰。藏鋒猶不許。露刃更何堪。問。賓頭盧應供四天下。還得徧也無。師曰。如月入水。問。如何是用而不雜。師曰。明月堂前垂玉露。水晶殿裏撒珍珠。有行者問。某甲遇賊來時。若殺卽違佛教。不殺又違王勅。未審師意如何。師曰。官不容鍼。私通車馬。至太平興國二年三月。戒門人曰。吾不久去世。汝可就本山頂預修墳塔。至五月二十三日功畢。師曰。後日子時行矣。及期。會雲門爽和尚。溫門舜峯長老。七人夜話。侍者報三更。師索

香焚之合掌而逝。

宋行明禪師。長洲魯氏子。從師歷五臺峨眉。禮文殊普賢二菩薩。菩薩皆隨心應現。後棲祝融峯七寶臺。誓投軀學薩埵太子。越多劫而成聖果。委身虎豹。爭競食之。須臾肉盡。同學泰布衲。收其殘骼焚之。得舍利焉。

宋繼業。三藏耀州王氏子。薙髮於東京天壽院。乾德二年。奉詔入天竺。求舍利及貝多葉。至開寶九年。始歸。聽擇名山修習。登峨眉。至雙飛橋。見兩石鬪溪上。攬得其一。眉目宛然。以爲寶瑞。因名寶現溪。見牛心衆峯環翊。作庵以居。已而爲寺。年八十四。示寂。有遺錫在牛心寺。

宋茂真。居白水寺。太平興國五年二月。奉詔入朝。太宗賜詩美之。館于景德寺。舒王元珍以夢兆語真。真曰。當有儲嗣。果育仁宗。既歸。重興五山六寺。後遣張仁贊齎黃金三千兩于成都鑄普賢大士像。高二丈六尺。至今供養。

按此茂真。非隋茂真尊者。乃另是一人。

宋白水宗月禪師。谷隱靜顯法嗣。黃龍慧南之孫。與晦堂祖心兄弟。

宋密印安民禪師。嘉定州朱氏子。初講楞嚴于成都。爲義學所歸。時圓悟居昭覺。師與勝禪師爲友。因造焉。聞悟小參。舉國師三喚侍者因緣。趙州拈云。如人暗中書字。字雖不成。文彩已彰。如何是文彩已彰處。師心疑之。告香入室。悟問座主講何經。師曰。楞嚴。悟曰。楞嚴有七處徵心。八還辯見。畢竟心在甚處。師多呈義解。悟皆不肯。師復請益。悟令一切處作文彩已彰會。偶僧請益十玄談。方舉問君心印作何顏。悟厲聲曰。文彩已彰。師聞而有省。遂求印證。悟示以本色鍵鎚。師則罔措。一日。白悟曰。和尚休舉話。待某說看。悟諾。師曰。尋常拈鎚豎拂。豈不是經中道。一切世界諸所有相。皆卽菩提妙明真心。悟笑曰。汝原來在此中作活計。師又曰。下喝敲牀時。豈不是返聞聞自性。性成無上道。悟曰。汝豈不見經中道。妙性圓明。離諸名相。師於言下釋然。後悟爲衆小參。舉古帆未挂因緣。師聞未領。求決。悟曰。汝問我。師舉前話。悟曰。庭前柏樹子。師卽洞明。謂悟曰。古人道。如一滴投於巨壑。殊不知大海投於一滴。悟歎曰。

奈這漢何。未幾令分座。

悟有偈贈師。載詩集。

尋開法保寧。遷華藏。旋里領峨眉中峯。上堂衆賣

華兮獨賣松。青青顏色不如紅。算來終不與時合。歸去來兮翠藹中。可笑古人恁麼道。大似逃峯赴壑。避溺投火。爭如隨分到尺八五分。饅頭邊討一箇半箇。雖然如是。保寧半箇也不要。何故。富嫌千口少。貧恨一身多。冬至上堂。舉玉泉皓和尚云。雪雪片片不別下。到臘月。再從來年正月。至十月。依前不歇。凍殺餓殺。免教胡說亂說。師曰。不是罵人。亦非讚歎。高出臨濟德山。不似雲居羅漢。且道玉泉意作麼生。良久云。但得雪消去。自然春到來。師後示寂於本山。閣維舍利頗賸。細民穴地尺許皆得之。光明瑩潔。心舌不壞。

宋慧遠禪師。生於眉山金流鎮彭氏。年十三。投藥師院僧宗辨出家。祝髮受具。卽往成都習經論。還峨眉靈巖寺。時徽禪師住焉。徽黃龍南四世孫。知見甚高。師初入門。值徽飯罷。於庭廡間閒行。師纔見。卽放包。問曰。文殊爲七佛之師。未審甚麼人爲文殊之師。徽云。金沙灘畔馬郎婦。時有起鐵拂者爲首座。師亦往親近。起常誘掖之。兩

歲未有所得。一日靜坐次。有僧獨行自語云。假四大以蓋覆。緣六塵而生心。忽遇六塵頓息。喚甚麼作心。師聞之。忽有省。遽起告座。座可之。上方丈告徽。徽亦可之。明日卽告行。同志挽留。師不聽。曰。吾師以爲可。而我終未釋然也。時圓悟自雲居歸蜀。住昭覺。師造焉。每問話。請益辭旨峭硬。悟深契之。一日。悟普說。舉龐居士問馬祖。不與萬法爲侶者。是甚麼人。祖云。待汝一口吸盡西江水。卽向汝道。師聞舉。豁然大悟。仆於衆中。衆以爲中風。共掖起之。師乃曰。吾夢覺矣。至夜。悟小參。師出問曰。淨裸裸。空無一物。赤骨立。貧無一錢。戶破家殘。乞師賑濟。答云。七珍八寶。一時拏。師曰。賊不入謹家之門。答云。機不離位。墮在毒海。師隨聲便喝。悟以拄杖擊禪牀云。喫得棒也未。師又喝。悟連喝兩喝。師禮拜。悟大喜。以偈贈師。有舊鐵舌轉關樞之語。衆目之爲鐵舌。師自此機鋒峻發。無所牴牾。師自發明心要。卽得遊戲大自在。三昧。嘗因開鑪陞座。曰。天無門。地無壁。葫蘆棚上種冬瓜。兩手扶犁水過膝。跳金圈。吞栗棘。氈柏板對無孔笛。屈屈獨腳山魈解雙趺。去年冬裏無炭燒。今年定是無火炙。饑時饑到眼睛。

黃窮時窮到赤骨立。屈屈。且道屈箇甚麼。頗柰監寺副寺維那典座直歲等。卻與泥水匠商量。放出兩頭鴟吻。齧殺佛殿脊。奉詔住高亭山崇先寺。未幾。再命靈隱開堂。孝宗皇帝屢詔入內。賜號佛海禪師。上堂。說偈曰。淳熙二年閏季秋九月旦。鬧處莫出頭。冷地著眼看。明暗不相干。彼此分一半。一種作貴人。教誰賣柴炭。向你道。不可毀。不可讚。體若虛空沒巖岸。相呼相喚歸去來。上元定是正月半。於時都下喧傳。師當以正月十五日遷化。遂達上聽。至期無疾。陞座祝聖如常儀。上亦密遣中使。伺師起居。皆見師往來如常時。送歸奏。齋罷。侍者與俗官同上方丈。但見門扃閉甚密。師素畜一黑猿。頗馴。能知人意。因衣以布襖。命之曰猿行者。至是。求師不見。因窺於窗隙中。但見猿手持一卷書。立於牀前。遂亟從後路至榻前。撥開帳子。而師已化矣。取猿手中書觀之。乃辭世頌曰。拗折稱錘。掀翻露布。突出機先。鴉飛不度。留七日。顏色不變。壽七十四。

宋釋道宏。峨眉人。姓楊氏。受業於雲頂山。相貌枯悴。善畫山水僧佛。晚年似有所遇。